

Kolosi

Yesu pi wel wiak kutömweri sēen wē krismaki 32 pōta ök won sēen Pool pi Rom kak wii kaatak wē pep epwer retēng äak Tikikasre Onisimas piarip mangkēn wak sē Kolosi kakē ingre mor saurō mena. Pim retēng äauta songōnte epēl. Pool pi ngōnēn ya yamēngkautaan wii kaatak moulmēēn wēēn Epapras pim naē sē omēn narōak Kolosi ingre morōrōen ngōnēn kaarōt mēēa pōt ök mēēa. Pitēm ngōnēn kaar pōt epēl. Anuture omnarōa tekarak tiarim yaya mapenaarō wē. Nent, Yesu pi Anutuu ök won, enselōrōa ököp. Ēn nent pōt, kaōmp nant ngēs olēak wēaare korōp kaut yailaut ngōn pōt ök maan kat wiak Poolök ngōn kaar pōt tekeri wasēpēnēak retēng ē mena.

Pōt epēl wia.

Ngōn ngēs rēaut *1:1-8*

Kristoē wēwēetere ya yamēngkaut *1:9-2:19*

Kristook yal menak wēauta ngōnte *2:20-4:6*

Ngōn mēēt *4:7-18*

1 ¹⁻²O Anutuu omnarō, Kristo pim kentōökē ěnēm ěeim Kolosi kak wēaurō ne Pool Anutuu kēmtak Yesu Kristoē ngōn yaaō omēn nampök Timoti tiarim karip piiring wē pep epwer retēng ē yaningk. Anutu tiarim Pepap pim komre kolap pōt ningkēn arim naē wiaap.

Pool pi Kolosi omnarōaan Anutuun yoōre ěrēp mēēa

³Tenpim akun ěl epotē Anutuun arimēēn kimang yamēēautē Anutu, tiarim Aköp Yesu Kristoē Pepapōn, yoōre ěrēp maim wē. ⁴Pōt Epapras puuk ar Kristook yal äak wē kön wi kosang mowasōōre Anutuu omēn pourō lup sant elmē pēl yaauta ngōnte ök niaan kat yawi pōtaanök. ⁵Ngōn yaapēt, ngōn ompyaō pōt, wet rēak arim naē yaarōōn ar omēn ompyaut kutömweri arimēēn yaō ěa pōta ngōnte kat wiaurō. Pōtaanök ar kön kosang wiak omēn ompyaō arimēēn kutömweri yaō ěa pōtōn kor wē pōtaan kön wi kosang wasōōre lup sant elmē pēl yaaurō. ⁶Anutuu ngōn ompyaō pōt wet rēak arim naē orōōn kat wiak pim komre kolap pōta songōnte kēēkē ěwat san akun pōtak ngēs rēak ngaarēk wēēn arim naē ulōl sa. Pēl yaēēn yang muntatēērōa naēēta tapēl ngaarēk yeōn ulōl sē yes. ⁷Ngōn ompyaō pōt, Epapras, tenpim kar panēēp, neering Kristoē

inëen yaalmë pöpök rë nuulön kat wian. Puuk nem urtak Kristo pim yaat këékë wesak yamëngk. ⁸Pi tapöpök Ngëëngk Pulöök arim naë lup sant yaaut tekeri wes nina pöten tenipön ök yenia.

Pool pi Kolosi omnaröaan Anutuun kimang mëea

⁹Pël yenia pötaanök tenip ngön pöt kat wia akun pötak ngës reak Ngëëngk Pulöök arim lupre könöt kaö nuwasën Anutuu arim ëënëak kön yawi pöten ewat panë sënëëtaan kimang maim wë. ¹⁰Pël ëen ar Aköpë kan pet yaalni pöök yok pangk yesën pi itenak ërëpsawi ëëpnaat. Pël yaëen arim naë këet oröön omën ompyaö ke nentere nent yeem Anutuu yaauten këékë ewat sëen ewat pöt kaö sëpnaat. ¹¹Tenip ar ërëpsawiarung ya wiap wëere lup kosang wë pël ëënëak Anutuuk pim wëere kosang kaö panëetak wëere kosang nimpnaataan kimang maim wë. ¹²Pël maimeë Pep ar kaamök elniin pim omnaröaan yaö niwesaut, ëwaatak wia pöt, tenring öpenaataan yoöre ërëp maim wë. ¹³Anutu pi tiar kouta öngpökaan nuwak pim Ru panëëpë wa ngaöök yanimë pöta öngpök niulëen wë. ¹⁴Pim Ru pöpök utpetetakaan ent ë niulëak tiarim utpetat won wes nuulëa.

Kristo pim wëwëetere ya yamëngkaut

¹⁵Kristo pi Anutu itnaangkanëpë ököp. Pi ngaanëer omnant won wiaan wakaimaupök peene pötë kaö sak wë. ¹⁶Anutuu Ruup pi kutömweriaan yangerakë omën ël epot pout ket ë pet iraup. Omën tiarim ityaangkautre itnaangkënöt, wëere kosangring kutömweriire mopöök wëaurö, isaare irëa pourö ket ëa. Anutuuk moulmëen Kristo pi omën ël epot poutë pep sak öpënëak ket ëa. ¹⁷Pi omën pout won wiaan wakaimaup. Pim wëere kosangöök elmëaan omnant pout neenem urötë wë. ¹⁸Pi ingre mor saurö tiarim kepön sak wë. Pël ëen ingre mor saurö tiar pim möönre koröpö pël yaë. Pimënt tapöpök ingre mor saurö tiarim songönte. Puuk omën poutë kepön erën elniak öpënëak weletakaan ngës reak wal ëa. ¹⁹Pöt Anutu pim kentöök pimtë wëwëere wëere kosang pout yang elmëen wak wë. ²⁰Pël yaëen Anutu pi pim Ruupön maan omën ël epot pout kutömweriaan yangerakë, piiring lup kopëtemer sak öpënëak kön wia. Pël ëëpënëak pim Ruup këra yetaparak möön iit il ngentiin pötak mayaap pöt tekeri wes nina.

²¹Ar pöt, ngaanëer Anutu nerek wëen ar nerek wë omën utpetat ëeimeë piin kööre tok elmëeimauro. ²²Pël ëauröak Kristo pim koröpre mësepring oröak wel wia pötak ar wiap nuwasën peene Anutu piiring wë. Puuk arim ketre saunat won nuwasën lup kölam wëen Anutuu ëöetak niulëëpënëak pël ëa. ²³Pötaanök ar kön wi kosang yewesautak wë panë sak tauaan omën nantök wer nuön kön wi kosang yewesaut këlok sëpanëen ngönën rë nuula pöt taë wes wak ön. Pool ne ngön ompyaö

piptaan ya omën saup. Ngön ompyaö pöt tenök ar yang ël epotëeröen ök niaim.

Pool pi Kolosi omën ingre mor saurö kaamök elmëa

²⁴Nem arimëen këlangön kat yawi eptaan ya kë yes. Kristo pim ingre mor saurö, tiar pim möönre koröp wak wë pöröaan këlangön kat wia. Pöta ök neenta arimëen këlangön kat wiima nant om wia. Pötaanök ar ingre mor saurö kaamök elniak këlangön om wia pöt kat wi pet irumaaten kent yaë. ²⁵Anutu pim ngönte tekeri panë wesak ök niamëak ingre mor sauröa ya omën neulëaup. ²⁶Pim ngön epët, ngaanëer ëlëep wiaan tiarim ëere körörö kat nawiin wë aprö imautak peeneek pim omnarö tiar tekeri wes yaningk. ²⁷Anutuuk pim omnarö tiarën ngön ëlëep ompyaö panëet, omën ngönën kopëlörö arim naë wia pöt, tekeri wes nimpënëak kent yaë. Pöt epët. Kristo pi arring wë. Pötaanök ar piin kor wëen puuk nukoirak kutömweri së piiring önëet. ²⁸Pötaanök tenök Kristo pim songönte omën pouröen tekeri wesak niaim. Pël eimeë utpet yaaut kasëng mampunëak pepanöm niaöre ewatring wë rë nuulëeim. Ar Kristoë ök sak önëek yakök yaalni. ²⁹Ne ar pël ëënëak pim weëre kosang kaöat yenang pötring weë yengenti.

Kön wi kosang wesak wë ngön kaaröt ke ur olapa

2 ¹Ne ar omën epötön ewat sënëak kent kön yawierek kat wieë. Arre ingre mor sa Leotisia kak wëauröere omën ingre mor sa munt neen itnaangkën naröaanta weë ngentiak ya kaö yamëngk. ²Ne ar lup kopëtemer sak neneren lup sant elmëeë lup kosang sëere kön këëkë wieë kön wi kosang wasö pël ëënëak weë yengenti. Ar pël ëënë pötak Anutu pim ngön ëlëep wiakaima pöta songönten ewat sënëet. Pöta songönte Kristo. ³Pi kön tektekre ewat pepap yak omën poutë songönöt ewat wë. ⁴Nem pël yeniak pöt, omën naröak ngön kaar niak wiap nuwaspanëak ngön pipët ök yeniak. ⁵Nem yeniak pöta songönte epël. Nem koröpöök maimerek wë, ën lupmer pöt arring wë. Pël ëeë arën itaangkën arim lup kopëtemer sak wë wotpil yaautre Kristoon kön wi kosang yewesaut taë wia pöten ërëpsawi yeë.

Kristook yal ëak wëwë kosangët öpa

⁶Ar Aköp Yesu Kristo wan pöl piik yal menak weë. ⁷Pël ëak piik misën il tëak pim weëre kosangöök kosang sak wë kön wi kosang yewesauta kan ök niak rë nuula pöök pëen wë kaö wesak yaya maim weë.

⁸Omën naröak ngön kaar mos kë wonöt ök niaan kat wiin pötök wi nitëepanëen këëkë ngarangk ëak weë. Pöt Kristo pim naëaan wonöt, ëaröa ngön pas yangerakë pëenöt. ⁹Ar ewat wë. Anutuu wëwëere weëre kosang pout Kristoë koröpöök pangk ëak wakaima. ¹⁰Pël ëaap piik yal ëak wë pim

wëwëet wak omën nenten ap newasngan. Pi isaup, omën isauröa kepönöököp. ¹¹Ar pöt, Yuta omnaröa yaaul Anutuun yaö eëneäk koröp kaut nailën äauröak wëwë utpetat kasëng menak Kristoë naë rë olëak piik yal menak wëen puuk koröp kaut yail pöl elniak Anutuun yaö niwasën wë. ¹²Arim i yanimë piptak Kristook yal äak wel wiin piiring yang kel niweera. Ën i yanimë taptak Anutu pim weëre kosangöök Kristo weletakaan wal ë moulmëa pöpök ar pim weëre kosangöön kön wi kosang yewasën Kristoorng wal ë nuulëa. ¹³Ngönën köpël wakaimaurö, ar ngaanëer arim lupötë Anutuun yaö naën wëwë ngaantakël wë utpetat eimaurö. Pël eën pötök lupöt mën wel niwia. Pël äautak peene pöt, Anutuuk elniin Kristoorng wëwëetak wë. Pël yaëen pi tiarim utpetat ent ë yanuula. ¹⁴Tiar Moses pim ngön kosangötë ngön wia pöt ngaarëk naön wëen pötök utpet kangut tiarim naë orööpnaat, pël äa. Pël äautak Anutuuk utpet kang pöt kërë olëa. Kristo pim këra yetaprak möön wel wia pötak Anutuuk kang pöt won wesa. ¹⁵Kristoë këra yetaprak isa pötak Anutuuk kutömweriaan mopöök omën utpet isaare weëre kosangringörö il mowesak pitëm weëre kosangöt ent ë moolëak omnaröa eöetak pitëm songönöt tekeri wesa.

Tiar Kristoorng wel wiaurö

¹⁶Tiar Moses pim ngön kosangötë öngpök naön. Pötaanök omën nampök arim iire kaömp yena pötaanre krismaki ma ngoon ma sant pötë öngpök akun nent ngëëngk newasën yeë pötaan utpet wesak niaan pöt kat mowiinganok. ¹⁷Omën pipotön ököököt pël apenaat. Këët orööpëneäk yaëen wet rëak oröaut. Peene kë panë pöp, Kristo, pimënt oröak wë. ¹⁸Omën naröak arimtën wak irëak enselöröen yaya manëak kaar yenia pipot kat mowiingan. Pit omën pipotön wangerötë itena pël niak köntak ieping eimeë yangerakë kentöökë ënëm yaë. ¹⁹Omën ke pilörö Kristook yal naën wë. Pi tiarim kepönö, ën ingre mor saurö tiar pim möönre koröpö. Kepönöök möönre koröpö kaamök elniin urötre kosatring yal eën pangk yaë. Pël äaan Anutuuk weëre kosangöt yaningkën kaö yes.

²⁰Ar Kristoorng wal wiin yangerakë omnantë öngpökaan ent ë nuulëauröak tol eën yang omnaröa yaaul yeë? Tol eën ngön kosang ke epot ngaarëk yeë? ²¹“Epot mor öngan.” “Epot nëngan.” “Epot mësël eëngan.” ²²Ngön kosang pipotök tiarim yangerakë omnant wak wëen lëngë yes pötön ya. Ngön kosang pipot omnaröa könöökäänöt Mosesë ngön kosangötë yal yemangk, Anutu naëaan wonöt. ²³Ngön kosang pipotök enselöröen yaya maimeë arimtën wak irëak arim möönre koröpötön nga elmëëneäk yenia. Pël yaalni pipotön omën naröak kön wiin ompyaö yaë pël yewas. Pël yaëetak pötök koröpöökë kentre kaur pöt pangk kan newariipan.

Anutuuk tiar Kristoorng weletakaan wal ë nuulëaurö

3 ¹Ar Kristoë wal äautak yal äak piiring wë. Pötaanök omën këët o kutömweri Anutu yaapkëetakël, Kristoë kaö sak wë pörek

wia pötön war kön wieë. ²Ar yangerakë omnantön kön wiinganok, kutömweri wia pötön kön wieim ön. ³Pöt Kristoë wel wiautak ar yal äak wel wiin arim wëwëat Kristooring Anutuu naë ëlëp wiin wia pötaanök. ⁴Ënemak Kristo wëwë pepap pim orö tekeri sëpna akunetak arta piiring Anutuu ëwaatak orö rënenët.

Lup ngaanöt sëp wesak lup ngolöpöt öpa

⁵Pötaanök koröpökë kent arim yeë pipot sasa kasëng meneë. Pöt epot. Öngre omp nga yaaö, lup kewilring yaaö, öngre omp neneraan kentre kaur yaaö, omën muntaröa omnantön war yaaut. Omën muntaröa omnantëën war yaaö pötak Anutuu urtak yangerakë omnantön omp ak yewas. ⁶Omën Anutuu ngön wa olëak utpet pipot yaaö piporö puuk kangut mampnaat. ⁷Arta ngaanëër omën ke pilöröaring wë pitëm yaaul eim wakaimaurö. ⁸Pël äauröak peene pöt, ngaare ya sangën, kön utpet mowiire ökre wasre koö ngön, utpet pipot sëp weseë. ⁹Ar neneren kaar mangan. Lup ngaanötë utpet yaaut ent ë olëak ¹⁰lup ngolöpöt wak wë pötaanök. Anutuuk lup ngolöp pöt ket äak nina. Pël äak ket elniaupök kët ël epotë könöt ngolöp nuwasën könring sak pimtë ök seim wë. ¹¹Wëwë ngolöp eptak tiarim kom äak wakaima pöt won yes. Yuta omnaröere muntarö, koröp kaut yailauröere nailën yaaurö, ëwatöröere köpëlörö, inëen yaauröere inëen naënörö, pöt pout mosöt pël yaë. Ën Kristo tiar pouröa kaö sak tiarim lupötë wë pötakëër kët pël yaë.

Neneraan lup sant elmëëpa

¹²Anutuuk ar pimëen yaö nuwasën pim omën sak wëen lup sant yaalni. Pötaanök omnaröen yaköm kön wieë kaamök ëere sant elmë, arimtën kön wiin wak iraöre ya wiap ë, omnaröak utpet yaalniin kangiir nga naalmëen ë pël ëëë. ¹³Naröak könöm nant elniin pöt wak weë. Ën arim tekraakan nampök utpet elniin pimëen ngön wieë pöt kangiir elmëenganëp om pim utpet pöt won wes moolaë. Kristook arim utpetat won wes nuulëa pöl arta ëëë. ¹⁴Lup sant yaaö pötak omën ompyaö muntat il yewas. Pël äak pötak ulöp urak ëen pangk yaë. Pötaanök omën ompyaö pipot yeem lup sant pötaring weë. ¹⁵Pël ëen Kristook mayaap yaningk. Pötak arim lupöt wotpil wesak ompyaö yeë ma won pöt pet elniip. Anutuuk ar möönre koröp kopëtaö wak lup kopëtemer sak mayaptaring önëak yas niia. Pötaanök kët ël epotë piin yoöre ërëp maim weë. ¹⁶Kristo pim ngönte arim lupötë ilëak kaö sëp. Ar ëwat wë. Neneren rë moulöore utpet yaaut kasëng mampënaan pepanöm maö pël ëëë. Arim lupötök Anutuun yoöre ërëp elmëak ngönën tanre Pulöök elniin Anutuun yaya tan aö pël ëëë. ¹⁷Anutu Pepen Aköp Yesu tiarimëen elnia pötaan yoöre ërëp maimeë omën këmtak aöre moresök ya mëmpö pël yeë pipot Yesuun wesak ëëë.

Ëlre pepere rungaaröa ngönte

¹⁸ Öngörö, arim ompöröaan inëen elmëeë. Aköpëen yaö saurö, ar pël ëen ompyaö ëëpnaat. ¹⁹ Ompörö arta, arim öngöröen nga elmëengan, lup sant elmëeë. ²⁰ Rungaarö ar, arim ëlre peparöa ngön ngaarëk weë. Pël yaëen Anutuuk itaangkën pangk ëëpnaat. ²¹ Ën peparö arta, arim rungaarö ya utpet ëëpanëen ya sangën mongawisngan.

Inëen yaaöre ngarangköröa ngönte

²² Inëenörö ar, kët ël epotë arim ngarangköröa ngön ngaarëk weë. Arim ngarangköröak itaangkën ompyaö ëëpnaataan pëen won, Aköpön kasinkasin yeem weë ngentiak pitëm ngön ngaarëk weë. ²³ Arim ya yamëngk pipot pout omnaröaan won, Anutuun yeë. Pötaanök weë panë ngentiak mëneë. ²⁴ Ar ëwat wë. Aköpök kangut nimpnaat. Puuk ar pim omnaröaan yaö ëa pöt ningkën önëët. Pöt ar Aköp Kristo pim inëen yaalmë pötaanök. ²⁵ Ën omën utpet yaë pipop Anutuuk pim utpet yaë pöta kangut mampnaap. Anutu pim ngön yaatak omën yapinringre yapin won pourö mööngkraar kangk naalniipan

4 ¹ Ngarangkörö ar, wotpil wesak arim inëenörö mëngkre mëngk ngarangk elmëeë. Pöt arta arim wotöököp kutömweri wë arën itena pël weseë.

Kimang yamëëautere ompyaö wëauta ngönte

² Ar pourö kosang wesak Anutuun ök maim ön. Pël eimeë ök yamëëautak Anutuun këëkë kön wiak yoöre ërëp maim ön. ³ Pël ëak arim ök yamëëautak tenimëenta Anutuun kimang maim ön. Pi kan nent koir ningkën pim ngönte ök mëak Kristoë ngön ngaan ëlëëp wiakaima pöt ök menaan kimang maim ön. Ne ngön pöt ök yamëëautaan wii kaatak wë. ⁴ Kimang maim önë pötak kaamök elnëaan nem ëëmëak neea pöl ngön ëlëëp wiakaimauta songönte wa kotiak ök memaat.

⁵ Ngönën kat nawiin wilëngkëël wëaurö pitring wë akun il wasnganëen omnant këëkë kön wieëak ëen. ⁶ Arim ngönöt ompyaö pan misëngring tomunatë ök ëëp. Pël wë omnaröen ngön kaip ti mampunëëtaan poprak naën ëënëët.

Poolök Tikikasre Onisimas wes mëa

⁷ Nem wë pöta ngönte Tikikas puuk waisak ök niapnaat. Pi nem kar panëëpök Aköpë ya omën ompyaup, neering ya ngawi yamëngkaup. ⁸ Ten tolëël wë pöta ngönte ök niaan kat wiak lup kosang sënëak nook wes mëen yewais. ⁹ Pël ëak Onisimas, tiarim kar panëëp, piiring wes mëen yewais. Pi arim kakaanëp ya sëp newasën om wëaup. Piaripök eprekë yaaut ök niapnaat.

Pool pi Kolosi omnaröen yoöre ërëp mëä

¹⁰Aristakas neering wii kaatak wëaupök arën yoöre ërëp yenia. Ën Maak, Panapas pim nang karip, puukta tapël yenia. Pi arim naë waisën pöt nem niak pöl sant mowasën. ¹¹Ën Yesu, yapin nent Sastas, piita arën yoöre ërëp yenia. Yuta omën nem karuröa naëaan pitökëer ketumön newesak omnarö Anutuuk wa ngaöök mëëpënëak neering ya yamëngk. ¹²Pël äak arim kakaanëp, Epapas, Yesu Kristoë ya omnamp, puukta yoöre ërëp yenia. Ar kosang sak Anutuu arim ëënëak yaalni pöt kön wi sokolön yak kët ël epotë kosang wesak kimang maim wë. ¹³Pim songönten nem ëwat wë yeniak epop. Pi arimëenre Leotisiaare Irapolis ka pöteparë omnaröaan kaamök elniipënëak ya kaö yamëngkaup. ¹⁴Luk root ompyaupre Timas piaripita yoöre ërëp yenia. ¹⁵Ne tiarim kar Leotisia kak wëauröen yoöre ërëp yemak pël ök man. Pël äak öng Nimpaare pim kaatak ngönënëen wa top yaauröenta tapël man. ¹⁶Pep epwer ar sangk kelak pöt wes mëen Leotisia ingre mor saurö pitta sangk kelëp. Ën kangiir Leotisia omnarö menan pöwer pit sangk kelak ningkën arta sangk kelën. ¹⁷Pël äak Akipas pipopön, “Aköpë ya nina pipët këëkë wesak mën,” pël man.

¹⁸Pep epwer omën nampön maan retëng ëa. Ën kaö epët pöt nemtok retëng yeë. Nemtok arimëen yoöre ërëp ngön retëng yeë. Ar ne wii kaatak wë pöt kön wieë nemëen Anutuun kimang maë.

Anutu pim komre kolap pöt arim naë wiaap.

[Yok pi tapët.

Ne arim karip, Pool.]